

Raja Perlis kesal pengangkutan makin teruk

BH / 180810 / 2 / 1 / D / Perlis LG

KANGAR: Raja Perlis, Tuanku Syed Sirajuddin Putra Jamalullail kesal dengan sistem pengangkutan di bandar ini yang baginda disifatkan semakin hari semakin teruk.

Baginda bertitah, sebagai contoh tambang yang dikenakan oleh pemandu teksi di negeri ini mahal dan tidak munasabah serta membebankan rakyat.

"Baru-baru ini ada rakyat

datang berkunjung ke istana beta menaiki teksi dikenakan tambang sehingga RM8 dari pekan Arau yang jaraknya tidak sampai dua kilometer.

"Kadar ini tidak masuk akal kerana jauh lebih mahal daripada caj yang dikenakan di bandar raya Kuala Lumpur.

"Ini menyebabkan rakyat yang kurang berkemampuan semakin dihimpit kesuahan kerana kos pengang-

kutan awam yang terlalu mahal," titah baginda pada majlis berbuka puasa bersama lebih 100 rakyat anjuran Majlis Hal Ehwal Agama Islam Perlis (MAIPs) bertempat di Tasoh Lake Resort, di sini, malam kelmarin.

Justeru, baginda berharap pihak berkuasa memantau keadaan itu bagi memastikan pemandu teksi tidak mengenakan tambang sesuka hati kerana mereka yang

menggunakan pengangkutan awam di negeri ini rata-ratanya berpendapatan rendah.

"Keadaan teksi di negeri ini juga ada yang sudah terlalu uzur dan kurang selesa untuk dinaiki. Hal ini boleh menyebabkan pelancong mungkin tidak gemar untuk berkunjung ke Perlis, sekali gus meninggalkan tanggapan negatif di kalangan mereka," titah baginda.

Terdahulu, pada majlis

itu baginda turut mewakili MAIPs menerima sumbangan zakat sebanyak RM178,970 daripada Syarikat Padiberas Nasional Berhad (BERNAS) yang disampaikan pengerusinya, Datuk Wira Syed Abdul Jabbar Shahabudin serta sumbangan untuk golongan miskin sebanyak RM80,000 oleh Yayasan Harmoni yang disampaikan Pengarah Eksekutifnya, Radzuan Abdullah.